

Sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersoq

Kapitali 1

Atuuffia

§ 1. Sanaartugassat suliarineqarnissaannut, imaluunniit sanaartugassat pilersaarutitalerlugit suliarineqarnissaannut neqerooruteqartitsisarnermut, aammalu suliakkiissutinik tunniussisarnermut inatsit atuuppoq.

Imm. 2. Neqerooruteqartitsisartunut ukununnga inatsit atuuppoq:

- 1) Namminersorlutik Oqartussat, ingerlatseqatigiiffiit Namminersorlutik Oqartussanit aalajangiisarnikkut sunniuteqarfisinnaasaat kiisalu kommunini oqartussaasut,
- 2) Neqerooruteqartitsisut allat, pisortanit tapiiffigineqarlutik sanaartugassanik neqerooruteqartitsisut, tassungalu qularnaveeqqusiissutit.

Imm. 3. Inatsit imm. 2 apeqquataatinnagu ukununnga atuutinnilaq:

- 1) Piginneqatigiilluni inissiat, sanatitsisunit namminersortunit sananeqartut aningaasalersorneqartullu, tamatumalu kingorna piginneqatigiilluni inissiaatillit peqatigiiffiannut tunniunneqartut.
- 2) Namminersorluni inissialiat, Inatsisartut inatsisaannut oqaasertaliussat naapertorlugit taarsigassarsititsinissamik neriorsuuteqarfiusut.

Imm. 4. Sanaartornermi suliakkiissutissap tunniunneqarnerani inatsit imaluunniit tassani maleruagassat tunngavissatut atuutissasut neqerooruteqartitsisup ersarissumik nalunaarutigisimappagu, neqerooruteqartitsinermi suliakkiissummillu tunniussinermi suleriaasissamut inatsimmi maleruagassat aammattaaq atuutissapput.

Imm. 5. Inatsimmi matumani maleruagassat imm. 4 malillugu atorneqartillugit, kapitali 7-imi maalaaruteqarnissamut maleruagassat tamatigut atorneqarsinnaapput.

Nassuiaatit

§ 2. Sanaartornermi suliassat tassaapput suliassat, sanaartorfimmi, illumi imaluunniit illuliami atortoqarfiliamiluunniit, suliat timitaannik aalajangersimasunik naammassisaqarnissamik siunertaqarfiusut.

§ 3. Inatsimmi matumani suliariumannittussarsiuussinertut paasineqassaaq, suliassap neqeroortitsivigineqarnerani arlalinnut piffissap aalajangersimasup ataatsip iluani, aammalu neqerooruteqartitsinermi tunngavissat assigiit, imaluunniit atuuttussamik neqerooruteqarnissamut piumasaaqatit minnerpaaffissaat ataatsimoortut, imaluunniit sanaartugassaq pillugu suleqatigiinnissamik pisussaaffiliisumik neqerooruteqarnissaq tunngavigalugit neqerooruteqartitsinertut.

Imm. 2. Tamanut ammasumik suliariumannittussarsiuussinermi tusagassiuutitigut naqitatigut

imaluunniit elektronik atorlugu tusagassiutitigut allagarsiinikkut kikkunnulluunniit neqerooruteqarnissamut kajumissaarisoqassaaq.

Imm. 3. Killilimmik suliariumannittussarsiuussinermi toqqaannartumik, imaluunniit neqeroortikkusutat kisiisa saaffigalugit neqerooruteqarnissamut kajumissaarisoqassaaq.

§ 4. Piukkunnartussarsiorneq paasineqassaaq tassaasoq, neqerooruteqartitsisup toqqaanissamut tungavissat ataatsimoortut tungavigalugit neqerooruteqartussatut kissaatigineqartunik toqqaanera.

§ 5. Sinaakktissatut isumaqatigiissutitut paasineqassaaq, assersuutigalugu piffissaliussap iluani sanaartugassat assinginut sananeqarsinnaasunut akit, pitsaassutsit amerlassutsillu, imaluunniit annertussutsit eqqarsaatigalugit piumasaqaatinik isumaqatigiissusiorfiusutut.

§ 6. Neqeroorutit suliariumannittussarsiuussinikkut imaluunniit sinaakktissatut isumaqatigiissusiornikkut pissarsiarineqarsimanngitsut tassaapput suliaqartinniakkat ilisimatereerlugit neqerooruteqartitsinerit.

Kapitali 2

Neqerooruteqartitsinermi pissutsit tungaviusut

Unammilleqatigiinneq assigiimmillu pineqarnissaq

§ 7. Sanaartugassanik inatsimmi matumani ilaatinneqartunik suliaqarnissamut, imaluunniit pilersarusiornissamut suliaqarnissamullu neqeroorutit tamanut ammasumik suliariumannittussarsiuussinikkut, imaluunniit killilimmik suliariumannittussarsiuussinikkut, suliaqartinniakkalluunniit ilisimatereerlugit neqerooruteqartitsinikkut pissarsiarineqassapput.

Imm. 2. Neqerooruteqartitsisup naammaginatartumik unammillersinnaalernissamut periarfissat atorluassavai.

Imm. 3. Neqerooruteqartitsisoq neqerooruteqartitsinissamik piareersaanermi ingerlatsinermilu, aammalu suliaqartitsinissamik tunniussinermi pisussaavoq, neqerooruteqartumik toqqaanermi kinaassusersiunngitsumik, piviusorsiorlumik immikkoortitsiviunngitsumillu tungaveqarnissaq, aammalu neqerooruteqartut akornanni assigiinngissitsisoqannginnissaa isumagissallugu.

Imm. 4. Neqerooruteqartitsineq atorneqarsinnaaffiisigut “Kalaallit Nunaanni sanaartornermi suliassanut pilersuinerimullu piumasaqaatit ataatsimoortut (AP)” imaluunniit allagartat allat pisortanit akuerisat naapertorlugit ingerlanneqassaaq.

Suliassat suliarinerini akiligassiissutaasartut

§ 8. Sanaartornermi suliassat suliarinerini akiligassiissutaasartut tamanut ammasumik neqerooruteqartitsisarnermut maleruagassanut ilaatinneqanngillat. Sanaartornermi suliassanut suliarinerini akiligassiisarneq pissutsit immikkut ittut pissutaallutik pisariaqartitsiviusuni, imaluunniit sanaartugassaq annerpaamik 300.000 koruuninik naleqartussaattillugu taamaallaat qaqutiguinnaq atorneqarsinnaavoq.

Imm. 2. Imm. 1 naapertorlugu pissutsit immikkut ittutut isigineqartut assersuutigalugu tassaapput

nutarterinerit, iluarsaassinerit allannortiterinerillu annertussutsimikkut, pitsaassutsimikkut piffissamillu atuiffiusussamik siumoortumik aalajangiiffigissallugit annertuumik ajornakusoortinneqartut.

Neqerooruteqarnissamut uppersaanissamullu piffissarititaasut

§ 9. Neqeroorutip tiguneqarsimanissaanut piffissarititaasoq neqerooruteqartitsinermi najoqqutassani allassimassaaq. Neqerooruteqartussaq neqerooruteqarnissamut naammaginantumik piffissaqarsinnaasunngorlugu piffissarititaasoq sivissussilerneqassaaq.

Imm. 2. Neqerooruteqartoq neqerooruteqartitsinermit najoqqutassani allamik allassimasoqanngippat, neqeroorutip tiguinissaanut piffissarititaasup qaangiunnerani ulluni suliffiusuni 20-ni neqeroorumminik atuutsitsinissamut pisussaaffeqarpoq.

Imm. 3. § 18 naapertorlugu suliariumannittussarsiuussinermi neqerooruteqartunut isumaqatiginninniarnermi, neqerooruteqartoq isumaqatiginninniarnissamut qaaqquneqanngitsoq imaluunniit isumaqatiginninniarnert ingerlanerini peersinneqartoq, aalajangiinerup neqerooruteqartumut nalunaarutigineqarnerani erngerluni neqeroorumminut qilersorsimajunnaassaaq.

Kapitali 3

Suliariumannittussarsiuussinermi periaaseq

Neqeroorutip ilusissaa

§ 10. Suliariumannittussarsiuussinermi neqeroorutit allagaassapput. Neqeroorut atortut elektroniskiusut atorlugit tunniunneqarsinnaapput, neqerooruteqartitsisoq siumoortumik taamaattoqannginnissaanik piumasaqarsimangippat.

Tamanut ammasumik killilimmillu suliariumannittussarsiuussinissamik piareersaasarneq

§ 11. Tamanut ammasumik suliariumannittussarsiuussinermi neqerooruteqartitsisoq teknikkikkut aningaasaqarnikkullu pisinnaasat, neqerooruteqartup neqeroorummik naammassinnissinnaasutut piukkunneqassaguni pigisassatut uppersaasagassai pillugit paasissutissanik piumasaqarpat, paasissutissat uppersaasatillu taakku suussanersut neqerooqqusilluni allagarsiussami allassimassapput. Aammattaaq suliassaq akikinnermik neqerooruteqartumut, imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq allagarsiussami allassimassaaq.

§ 12. Killilimmik suliariumannittussarsiuussinermi neqerooruteqartitsisoq tusagassiuutit naqitat imaluunniit elektroniskiusut atorlugu tusagassiuutit aqutugalugit neqerooruteqartitsinissamut allagarsiussamik tamanut ammasumik saqqummiussilluni neqerooruteqarsinnaasunut pilerisaaruteqarnermigut piukkunnartussarsiorsinnaavoq. Neqerooruteqartitsinissamut allagarsiussami allassimasussaapput

1) peqataanissamut soqutiginnilluni nalunaarnissamut piffissaliussaq, sivikinnerpaamik ullunik

suliffiusunik 15-inik sivisussuseqartussaq,

2) aningaasaqarnikkut teknikkikkullu pisinnaasat pillugit paasisutissat, piukkunnartussarsiornermut ilaanissamut uppersarsarneqartussat suussusissaat kiisalu taakkununga uppersarsaatissanut piunasaqaatit,

3) suliassaq akikinnerusumik akeqartitsilluni imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq, aamma

4) neqerooruteqartut neqerooruteqarnissamut kajumissaarneqartussat amerlanerpaamik qassiussanersut.

§ 13. Killilimmik suliariumannittussarsiuussinerit entreprenørit aalajangersimasut kisimik pisariaqartinneqartumik pisinnaasaqartillugit imaluunniit suliap naammassineqarnissaanut pisariaqartinneqartumik immikkut ittumik ilisimasaqartillugit, piukkunnartussarsiuussinertaqanngitsumik ingerlanneqarsinnaapput.

Suliariumannittussarsiuussinermi neqeroorutit ammarneqarnerini najuussinnaatitaaneq

§ 14. Suliariumannittussarsiuussinermi neqeroorutit sumiiffimmi suliariumannittussarsiuussiffiusumi piffissami siumut aalajangeriikkami ammarneqassapput. Neqerooruteqartut neqeroorutit ammarneqarnerini najuunnissamut, aammalu neqeroorutaasa annertussusaannik nalornissutaasimasinnaasunillu paasisaqarnissamut pisinnaatitaapput.

Tunniussinissamut tunngavissat

§ 15. Neqerooruteqartitsisup suliariumannittussarsiuussinissaq taamaatinngippagu, suliassaq ukuninnga tunngaveqarluni tunniunneqassaaq:

1) appasinnerpaamik akeqartitsisumut, imaluunniit

2) tunngavissat assigiinngitsut, soorlu akit, pitsaassuseq, piffissaq sanaffiususaaq, ingerlatsinermit aningaasartuutit, imminut akilersinnaassuseq, teknikkikkut naligititaasoq, avatangiisinut sunniutissat, sanaartugassamut titartakkat atuuffissallu, isumaqatigiisummi pineqartumi allanngorartuusinnaasut eqqarsaatigalugit aningaasaqarnikkut iluanaarnarnerpaamik neqerooruteqartumut.

Imm. 2. Tunniussinissamut tunngavissat suut atorneqassanersut neqerooruteqartitsinermi piunasaqaatini allanneqassaaq. Aningaasaqarnikkut iluanaarnarnerpaamik neqerooruteqartumut tunniussinissamut tunngavissani neqerooruteqartup tunngavissatut toqqarneqartut qanoq nalilersussanera sapinngisamik allanneqassaaq. Naliliisoqarsinnaanngippat neqerooruteqartup tunngavissat pingarnerit siulliullugit tullerriaassavai.

Imm. 3. Neqerooruteqartup suliassaq naammaginarumik pitsaassusilimmik, naapertuuttumik qajannaatsumillu, imaluunniit piffissaq eqqorlugu suliarisinnaanngikkai ilimanaateqarluinnarpat, neqerooruteqartitsisup neqeroorut itigartissinnaavaa.

Neqeroorutini qinigassat allat

§ 16. Neqerooruteqartitsisup neqeroorutini qinigassanik allanik neqerooruteqartut

eqqarsaatigisinnaavaat, neqeroorutini qinigassani allani taakkunani neqerooruteqarnissamut piomasaaqatit minnerpaaffissaat naammassineqarsimappata.

Imm. 2. Neqerooruteqartitsisup neqeroorutit allanik qinigassartallit tiguneqarsinnaannginnerat neqerooruteqartitsinermut piomasaaqatini allassinnaavaa.

Isumaqatiginninniarnarit

§ 17. Suliassap tunniunneqarnissaanut akit minnerpaaffissaat tunngavigineqartussaappat, neqerooruteqartitsisup appasinnerpaamik akeqartitsiniarluni neqerooruteqartoq kisiat isumaqatiginninniarfigisinnaavaa.

§ 18. Suliassap tunniunneqarnissaanut neqeroorutip aningaasaqarnikkut iluanaarnarnerpaanissaa tunngavigineqarpat, neqerooruteqartitsisup neqerooruteqartut, suliariumannittussarsiuussinermi tunngavissatut nalilikkat tullerriiakkalluunniit tunngavigalugit aningaasaqarnikkut iluanaarnarnerpaamik neqerooruteqartut pingasut ikinnerusulluunniit isumaqatiginninniarfigisinnaavai, neqerooruteqartitsinermi piomasaaqatini tamanna atortussaangitsutut nalunaarutigineqarsimangippat.

Imm. 2. Neqerooruteqartitsisup isumaqatiginninniarnissaq toqqarpagu, suleriaaseq suna malinneqassanersoq kingusinnerpaamik neqerooruteqartutut toqqarneqartunut, neqerooruteqartitsisup isumaqatiginninniarfigissallugit toqqarsimasaanut isumaqatiginninniarnarit aallartinneranni nalunaarutigineqassaaq, tamanna neqerooruteqartitsinermut piomasaaqatini allasimangippat.

Imm. 3. Isumaqatiginninniarnarit ingerlanneqarnerini neqerooruteqartut tamarmik assigiimmik pineqarnissaat neqerooruteqartitsisup qulakkiissavaa. Pingaartumik neqerooruteqartitsisooq paasissutissanik, neqerooruteqartut ilaasa allanit pitsaanerumik inissisimalernerinik kinguneqarsinnaasunik tunniussilluni assigiingisitsissanngilaq. Isumaqatiginninniarnarit nalaanni neqerooruteqartut allat aaqqiissutissatut akigititassatulluunniit neqeroorutai pillugit paasissutissat § 14 naapertorlugu tamanut ammasumik saqqummiunneqareersimappata, neqerooruteqartitsisup taamaallaat paasissutissat taakku neqerooruteqartumut tunniussinnaavai.

Imm. 4. Isumaqatiginninniarnarit suliassap annertuumik allanngortinneqarneranik, imaluunniit tunniussinissamut, tassungalu ilanngullugit nalilersuinerlut tullerriiaarinissamullu tunngavissat, imm. 1 naapertorlugu isumaqatiginninniarfissanik toqqaanermi tunngavissatut aalajangersarneqartut allanngortinneqarnerannik kinguneqassanngillat.

Kapitali 4

Suliaqartinniakkat ilisimatereerlugit neqerooruteqartitsineq

§ 19. Neqerooruteqartitsisup suliaqartinniakkat pingasut tikillugit ilisimatereerlugit suliassamut ataatsimut neqerooruteqartissinnaavai.

§ 20. Neqerooruteqartitsisut § 1, imm. 2-mi sanaartugassanut suliaqartinniakkat ilisimatereerlugit neqerooruteqartitsisinnaanngillat, matumani pineqanngippata:

1) sanaartugassat katillugit 500.000 koruuninik taakkuluunniit inorlugit naleqartut,

- 2) sanaartugassat aatsaat neqerooruteqartitsinermi tunngavigisat najoqqutaralugit ajornakusuungaatsiartumik aalajangiiffigineqarsinnaasunik annertussuseqartut, pitsaassuseqartut piffissaleneqarsinnaasullu, soorlu misileraanerit, ilisimatusarnerit ineriartortitsinerillu, imaluunniit nutarterinerit, iluarsaassinerit allangortiterinerillu, imaluunniit suliassat isumannaallisaaneq eqqarsaatigalugu pinngitsoorani suliarineqartussaallutik kinguartinneqarsinnaanngitsut,
- 3) suliariumannittussarsiuussinermi neqeroorutinik naleqquttunik imaluunniit peqqussutit malillugit suliarineqartunik tiguisoqarsimannginnera, imaluunniit aallaqqaammut neqerooruteqartitsinermi piumasqaataasut annertuumik allangortinneqanngippata qinnuteqaatinik tiguisoqarsinnaannginnera,
- 4) suliffeqarfik aalajangersimasoq ataaseq kisimi sanaartugassanik suliaqarnissamut periarfissaqartoq, imaluunniit
- 5) pissutsit immikkut ittut allat aalajangiisuulluinnartumik pingaaruteqartut pissutaallutik entreprenøri aalajangersimasoq toqqarneqartariaqarpat.

§ 21. Neqerooruteqartitsisup suliaqartinniakkat ilisimatereerlugit neqerooruteqartitsinermini suliassap tunniunneqarnissaanut appasinnerpaamik imaluunniit aningaasaqarnikkut iluanaarnarnerpaamik akeqartitsinissaq tunngavigineqassanersoq nalunaarutigissavaa.

§ 22. Neqerooruteqartup suliassaq naammaginartumik pitsaassusilimmik, naapertuuttumik qajannaatsumillu, aammalu piffissaq eqqorlugu suliarisinnaanngikkai ilimanaateqarluinnarpat, neqerooruteqartitsisup neqeroorut itigartissinnaavaa.

Kapitali 5

Isumaqatigiissutit immersugassat

§ 23. Isumaqatigiissutit immersugassat taamaallaat isumaqatigiissuteqartut akornanni pissutsinut toqqaannartumik sunniuteqarsinnaapput. Isumaqatigiissutit immersugassat taamaallaat neqerooruteqartup ataatsip suliffeqarfiullu ataatsip akornanni isumaqatigiissutigineqarsinnaapput. Neqerooruteqartitsisup pisariaqartinneqarpat suliffeqarfik isumaqatigiissusiornissamut atugassamik neqeroorutissaminik ataatsimoortitsinissamik qinnuigisinnaavaa. Tamannali isumaqatigiissusiornermi piumasqaatit annertuumik allangortinneqarnerannik kinguneqassanngilaq.

Imm. 2. Isumaqatigiissut immersugassaq sivisunerpaamik ukiuni sisamani atuussinnaavoq.

Kapitali 6

Qinnuteqartunut neqerooruteqartunullu nalunaaruteqartarneq

§ 24. Neqerooruteqartitsisup neqerooruteqartut, suliariumannittussarsiuussinermi neqerooruteqarsimasut, imaluunniit suliaqartinniakkat ilisimatereerlugit neqeroortinneqarsimasut suliaqartitsinissamik tunniussinissaq eqqarsaatigalugu qanoq aalajangiisoqarsimanera pillugu sapinngisamik pilertornerpaamik nalunaarfigissavai. Suliariumannittussarsiuussinerup taamaatinneqarnerani imaluunniit suliaqartinniakkat ilisimatereerlugit neqerooruteqartitsinermi ilisimatitsineq tamatumunnga tunngavilersuutaasunik imaqassaaq.

Imm. 2. killilimmik suliariumannittussarsiuussinermi piukkunnartussarsiuussinertalimmi, neqerooruteqartitsisup qinnuteqartut piukkunnartunut ilaanersut sapinngisamik piaarnerpaamik

nalunaarfigissavai. Aamma qinnuteqartoqarneratigut neqerooruteqartitsisup qinnuteqartoq ilaatinneqanngitsoq sooq qinnuteqaatip itigartinneqarsimaneranut tunngavilersuutigisaminik nalunaarfigissavaa.

Imm. 3. Neqerooruteqartitsisup qinnuigineqarnermini neqeroorutip itigartinneqarneranut tunngaviusoq neqerooruteqartunut kalluarneqartunut § 14, imm. 3 aamma § 22 naapertorlugit nalunaarutigissavaa, tunngavilersuut § 25, imm. 2 naapertorlugu nalunaarutigineqareersimangippat.

§ 25. Aningaasaqarnikkut iluanaarnarnerpaamik neqerooruteqarnissaq tunngavigineqarsimappat, aamma imm. 2-4-mi maleruagassat atuutissapput.

Imm. 2. § 18 naapertorlugu isumaqatiginninniarnarit aallartinneqarnerinut peqatigitillugu, neqerooruteqartitsisup neqerooruteqartut kalluarneqartut isumaqatiginninniarnernut qaaqquneqartussaanninnerannik aalajangiineq tamatumunngalu tunngavilersuutaasoq pillugu nalunaarfigissavai.

Imm. 3. § 18 naapertorlugu isumaqatiginninniarnarit naammassineranni, neqerooruteqartitsisup neqerooruteqartut, neqerooruteqartup isumaqatiginninniarnarfissatut piukkussimasani neqeroorummi aalajangiunneqartumi piginnaasat annertuumillu iluaqtissat nalunaarutigissavai.

Imm. 4. § 18 naapertorlugu isumaqatiginninniartoqarsimangippat, imaluunniit neqeroorutip suliaqartinniakkat ilisimatereerlugit neqerooruteqartitsinikkut pissarsiarineqarsimappata, neqerooruteqartitsisup qinnuteqartoqarneratigut neqerooruteqartunut, neqerooruteqarnissamut piumasqaatinik naammassinnissimasunut, neqeroorummi aalajangiunneqartumi piginnaasat annertuumillu iluaqtissat nalunaarutigissavai.

Kapitali 7

Suliariumannittussarsiuussinerit il.il. pillugit maalaarutit

§ 26. Neqerooruteqartitsisarnermut Maalaaruteqartarfimmik, neqerooruteqartitsinerni maalaarutinik suliaqartartussamik suliaasaqarfiit arlaannaannulluunniit attuumassuteqanngitsumik Naalakkersuisut pilersitsisinnaapput.

Imm. 2. Neqerooruteqartitsisarnermut Maalaaruteqartarfik ataatsimik siulittaasoqassaaq aammalu sulianut ilisimaarinnittunik marlunnik ilaasortaqaassalluni, taakkulu ukiuni sisamani atuuttussanngorlutik qinigaqqissinnaatitaallutillu toqqarneqartassapput.

Imm. 3. Kalaallit Nunaanni Landsdommerip Neqerooruteqartitsisarnermut Maalaaruteqartarfiup siulittaasussaa, aammalu taassuma sinniisissai ataaseq arlallilluunniit, inatsilerinermi atorfilittut soraarummeersimasussat toqqassavai. Siulittaasup taassumalu sinniisissaasa toqqarneqarnerani, sapinngisamik eqqartuussisunut fuldmægtigimik toqqaanermi piginnaanerisassat misilittakkatigullu tunngavissat assingi atorneqassapput.

Imm. 4. Kalaallit Nunaanni sanaartornermik suliaqartut inassuteqarnerisigut, Naalakkersuisut ilaasortassanik sulianik ilisimasalinnik marlunnik kiisalu taakkununnga sinniisissanik arlalinnik, tamarmik sanaartornermut ilisimasaqartuusussanik toqqaasassapput.

§ 27. Neqerooruteqartitsisarnermut Maalaaruteqartarfik inatsimmi matumani aalajangersakkanik, taakkulu malillugit maleruagassianik unioqqutitsinerit pillugit apeqqutinik suliaqartassaaq.

Imm. 2. Neqerooruteqartitsisarnermut Maalaaruteqartarfiup pissutsit imm. 1-imi taaneqartut

pillugit maalaarutinit aalajangiineri, sapinngisamik maalaarutip Neqerooruteqartitsisarnermut Maalaaruteqartarfimmut saqqummiunneqarneraniit sapinngisamik kingusinnerpaamik qaammatit pingasut qaangiunnerini pisassapput.

Imm. 3. Naalakkersuisut allatseqarnikkut Neqerooruteqartitsisarnermut Maalaaruteqartarfimmut ikiorsiisassapput, kiisalu Inatsisartuni Naalakkersuisunilu il.il. akissarsiat il.il. pillugit Inatsisartut inatsisaat naapertorlugu maalaaruteqartarfiup ilaasortaasa akissarsiaqartinneqarnissaannut maleruagassanik aalajangersaasassallutik.

Imm. 4. Neqerooruteqartitsisarnermut Maalaaruteqartarfik sulinini pillugu ukiumoortumik Naalakkersuisunut nalunaarusiortassaaq.

§ 28. Suliassaq allakkatigut ilanngussanik agguaaqatigiinnikkut piareersarneqartassaaq, tamatumalu kingorna siulittaasooq allamik aalajangiinnigippat oqaluinnarluni isumaqatiginninniutigineqartassalluni.

Imm. 2. Neqerooruteqartitsisarnermut Maalaaruteqartarfiup suliame illuatungeriinnit paasissutissat imaluunniit pissutsit Maalaaruteqartarfiup oqarsinnaatitaaffigisaanut ilaasut pillugit aalajangiinerit sulinermini pisariaqartutut isumaqarfigisani tamaasa piumasarisinnaavai.

Imm. 3. Neqerooruteqartitsisarnermut Maalaaruteqartarfiup oqaaseqaateqartinneqareerneratigut maalaaruteqartarfiup suleriaasissaa aammalu maalaaruteqartarfiup sulineranut maleruagassat sukumiisut Naalakkersuisunit aalajangersarneqassapput, taakkunungalugu maalaarutininik tunniussinerimi sullissinerit akillu, suliap akiata 1 procentianik annertussuseqartut, annerpaamilli 100.000 koruuniussat, aamma aalajangiinernik tamanut saqqummiussisarnerit ilaapput. Maalaaruteqartoq maalaarumminut taperserneqarpat, imaluunniit suliaq Neqerooruteqartitsisarnermut Maalaaruteqartarfimmi suliarineqarnissaminut naleqqutinngitsutut nalilernerqarluni itigartinneqarpat akiliut utertinneqartassanersoq pillugu Naalakkersuisut maleruagassanik erseqqinnerusunik aalajangersaasinnaapput.

Imm. 4. Neqerooruteqartitsisarnermut Maalaaruteqartarfiup suliame suliarineqarnerminni 100.000 koruunit inorlugit akeqartut suliarisinnaanngilai.

§ 29. Uku maalaaruteqartarfimmut maalaarumminnik tunniussisinnaapput:

- 1) kikkulluunniit inatsisit tunngavigalugit tamatumunnga soqutiginnittut,
- 2) Unammilleqatigiinnermut Ataatsimiititaliaq, kiisalu
- 3) kattuffiit pisortanilu oqartussaasut, Naalakkersuisut maalaaruteqarnissamut akuerisaat.

Imm. 2. Maalaaruteqartarfiup inuk alla imaluunniit pisortani oqartussaasooq, suliamut annertuumik pingaaruteqartoq, suliakkiisumut maalaarutigineqartumut iluaqutaasinnaasooq suliamut suleqataanissaanut akuerisinnaavaa.

Imm. 3. Kingusinnerpaamik maalaarutip maalaaruteqartarfimmut tunniunneqarneranut peqatigitillugu, maalaaruteqartoq suliakkiisumut unioqqutitsinermut patsisigineqartoq, aammalu maalaarutip maalaaruteqartarfimmut tunniunneqarsimanera pillugu allakkatigut ilisimatissavaa.

Imm. 4. Neqerooruteqartitsinerup inernerata neqerooruteqartumut nalunaarutigineqarneraniit, maalaarummik Maalaaruteqartarfimmut tunniussinissamut piffissarititaasooq sapaatit akunnerinik sisamanik sivilissuseqarpoq.

§ 30. Maalaarut aatsaat, maalaaruteqartarfiup imaluunniit maalaaruteqartarfik sinnerlugu siulittaasup maalaaruteqartup piumasaqarneratigut tamatumunnga aalajangiippat

atuuttussaatinneqarsinnaavoq.

Imm. 2. Maalaaruteqartoq maalaarummi maalaaruteqartarfimmut suliakkiissutigisamini tamakkiisumik ilaannaasumilluunniit taperserneqarsimatillugu, pissutaasut tunngavigalugit maalaaruteqartarfiup suliakkiisoq maalaaruteqartup maleruagassanik inatsimmi matumani taaneqartunik, aammalu maleruagassanik taanna tunngavigalugu suliarineqarsimasunik unioqqutitsinerup kingunerisaanik annaasaanut taarsiisussanngortissinnaavaa.

§ 31. Maalaaruteqartoq maalaarummi maalaaruteqartarfimmut tunniussamini tamakkiisumik ilaannaasumilluunniit taperserneqarpat, maalaaruteqartarfiup neqerooruteqartitsisoq maalaaruteqartup maalaarummi suliamut atatillugu aningaasartuutigisimasaanut akileeqqullugu piumaffigisinnaavaa.

§ 32. Maalaaruteqartarfiup aalajangiineri allaffissornermi oqartussaasumut allamut ingerlateqqinneqarsinnaanngillat.

Imm. 2. Maalaaruteqartarfiup aalajangiinerinut atatillugu aalajangiinerup pineqartumut nalunaarutigineqarnerata kingorna, kingusinnerpaamik sapaatit akunnerisa arfineq pingasut qaangiunnerini eqqartuussivinnut suliakkiissutigineqarsinnaapput. Piffissarititaasup iluani suliakkiisoqanngippat, maalaaruteqartarfiup aalajangiineri inaarutaasumik aalajangiinerussapput.

§ 33. Piaaraluni imaluunniit mianersuaalliorujussuarluni paasissutissanik eqqunngitsunik paatsoortitsisinnaasunilluunniit Neqerooruteqartitsinermi Maalaaruteqartarfimmut tunniussisoq, imaluunniit paasissutissanik suliamut pineqartumut pingaarutilinnik nipangiussisoq, imaluunniit Neqerooruteqartitsinermi Maalaaruteqartarfiup inerteqqutaanik peqqussutaanilluunniit naammassinninngitsoq akiliisussanngortinneqarsinnaavoq.

Imm. 2. Unioqqutitsisoq suliffeqarfiuppat tamakkiisumik ilaannaasumilluunniit naalagaaffimmit, Namminersorlutik Oqartussanit, kommunimit imaluunniit kommunit suleqatigiiffianit, aktiaatileqatigiiffimmit, anpartsselskabimit, andelsselskabimit assigisaannilluunniit pigineqartoq, suliffeqarfik il.il. tassunga akisussaatinneqarsinnaavoq. Taamatuttaaq unioqqutitsineq Namminersorlutik Oqartussanit, kommunimit imaluunniit kommunit suleqatigiiffianit piliarineqarpat tamanna atuutissaaq.

§ 34. § 28, imm. 2 naapertorlugupaasissutissanik Neqerooruteqartitsinermi Maalaaruteqartarfimmut tunniussinngitsoortoqarpat, maalaaruteqartarfik pineqartut ullormoortumik akiliisussanngortitsinerisigut pinngitsaaliisummik akiliisissinnaavai, taakkulu sioqqutsumik eqqartuussinertaqanngitsumik pinngitsaaliisummik naammassitinneqarsinnaapput.

Kapitali 8

Aalajangersakkat allat aamma atuutilerfia

Ilinniartut

§ 35. Sanaartukkat § 1, imm. 2-mi pineqartut suliarineqarnerinut atatillugu ilinniartut qanoq amerlatigisut atorfinitsinneqartarnissaannik Naalakkersuisut maleruagassiorsinnaapput.

§ 36. Inatsit 1. januar 2010-mi atuutilerpoq, piffissamillu tassanngaanniit suliassanut neqeroorteqartitsivigineqartunut atuutilerluni.

Imm. 2. Tamatuma peqatigisaanik suliariumannittussarsiuussisarnermut il.il. Inatsisartut inatsisaat nr. 3, 6. april 1992-imeersoq atorunnaarsinneqarpoq.

Imm. 3. Illuliassanut sanaartugassanullu neqeroortitsisarneq pillugu Namminersornerullutik Oqartussat nalunaarutaat nr. 15, 5. juli 2007-imeersoq atorunnaarsinneqarpoq.

§ 37. Pituffimmi sakkutooqarfik inatsimmi matumani aalajangersakkanut ilaatinneqanngilaq.

Namminersorlutik Oqartussat, ulloq 2. december 2009

Kuupik Kleist

/

Jens B. Frederiksen